

'E tiche sui veris :  
po tâs, dopo 'e torne  
sul tet 'e tambure,  
e sune te gorne,  
cor vie pe cunete  
e in bas la ricêf  
la tiare che bêf.

Le tiare, ché ingorde,  
la zupe, la inglôt,  
t'un lamp jé sparide,  
t'un lamp 'e va sot :  
là sot la spietavin,  
za son diviers dis,  
bramosis lidrîs.

La razze si spache  
lajù tal fossal,  
il ciâf fur de stale  
al slunge 'l nemâl :  
il polvar de ploè  
al nase, al respire,  
contènt si distire.

Ploiute cuiete  
contînue cussì,  
'ste gnot cole cole....  
Ce dolz il durmì,  
sintinti, ploiute,  
a bati il tambùr  
te gorne, tal scur !

GUSTAVO TAVOSCHI.

### La me barete.

'O levi vie par une strade strete:

piardèi la mé barete.

Siore Bete la ciatà.

Voi da siore Bete par fámile dá.

Siore Bete no me dà se no i doi pan.

Voi da mé mari a fámi dá pan.

Mé mari no mi dà pan se no i doi lat.

Voi da la vace par fámi dá il lat.

La vace no mi dà lat se no i doi fen.

Voi dal ciamp par fámi dá il fen.

Il ciamp no mi dà fen se jo no i doi la falz.

Voi dal batifiar par fámi dá la falz.

Il batifiar nol mi dà la falz se jo no i doi ardiel.

Voi dal pureit par fámi dá ardiel

Il pureit nol mi dá ardiel se jo no i doi glant.

Voi dal roul par fámi dá la glant.